

Partidonan politico tin cu entrega lista di donacion na comision di finanzas

Recientemente, a ser instala e Comision di Finanzas y pa prome biaha e comision den henter su constelacion lo supervisa e finanzas di tur partido y candidato durante henter e proceso di eleccion.

For di 1 januari 2021, e ley di Regulacion di Finanzas di Partido Politico (AB2020 no. 153) ta na vigor na Aruba e cual tin como meta pa controla e finanzas di e partidonan politico y candidatonan cu ta participa den e eleccion parlamentario.

E Comision di Finanzas di Partido Politico (Comision di Finanzas), di cual e presidente di Consejo Electoral ta fungi como presidente, ta encarga cu e supervision di e finanzas di tur partido politico y candidato.

Tur aña un parti di un partido politico mester entrega na comision finanzas un reportahe anual cual tin cu bay acompaña di un rapport financiero. “Algo nobo pa e



eleccion aki, ta bay ta registracion continuo y sistematico di tur donacion cu e partidonan politiconan registra y e candidatonan cu ta participa na eleccion tin cu tene y entrega na comision di finanzas,” segun Rosy Marchena presidente di Consejo Electoral a bisa den un prome conferencia di prensa cu a tuma luga recientemente.

Comision di Finanzas ayera a vocifera e reglanan cu ta conta pa tur partido politico y

candidato y cu lo aplica esaki segun ley durante e participacion den e eleccion parlamentario di dia 6 di december 2024.

Partidonan politico por haya hasta 50,000 florin di donacion. Un donacion ta tur placa ricibi directa- of indirectamente, producto of servicio ricibi cu tin balor, sin cu a paga of no completo pa esakinan.

Prome cu eleccion parti-

donan politiconan y candidatonan cu ta participa mester entrega un parti di e registracion di e donacion, despues di eleccion nan mester entrega e otro parti di e registracion.

Un persona, compania of organisacion por haci donacion di maximo 30,000 florin na un mesun partido politico y maximo 20,000 florin na e mesun candidato den un aña calendario, total 50,000 florin por ricibi di donacion.

Rekisitonan Principal

1. Registro di Donacion: Tur partido y candidato mester registra e donacionnan cu a ricibi for di 12 luna prome cu eleccion.
2. Entrega di Registro: E registro di donacionnan te 21 dia prome di eleccion mester wordo entrega na e Comision di Finanzas. Entrega di esaki mester tuma luga entre 21 pa 14 dia prome cu e eleccion venidero.
3. Declaracion di Entrada y Gasto: Tambe nan mester presenta un resumen di e entrada y gasto di nan ac-

tividadnan di recaudacion di fondo.

Si nan no cumpli cu e rekisitonan aki, e Comision di Finanzas por solicita informacion adicional y tambe por impone multa.

Publicacion di Donacion:

7 dia prome cu eleccion, e Comision di Finanzas lo publica un resumen di e donacionnan ricibi door di e partidonan politico y candidatonan.

Despues di eleccion, e partidonan politico y candidatonan mester entrega otro resumen dentro di 7 dia despues di eleccion y e Comision di Finanzas lo publica un rapport 14 dia despues di e eleccion.

Ta fundamental cu tur e partidonan politico y candidatonan cu ta participa den e eleccion dia 6 di december 2024 ta na altura di nan obligacionnan y cu nan lo cumpli cu e obligacionnan aki pa garantiza e transparencia financiero.

SSA ta apunta Herve Ruiz como director temporal

Manera ta conoci despues cu irregularidadnan den Stichting Sportsubsidie Aruba (SSA) a sali na cla, a retira e director K. Vrolijk inmediatamente. Gobierno di Aruba a informa ayera cu e fundacion a nombra un director temporal, esta sr. Herve Ruiz.

Basa riba statutonnan di fundacion SSA, cu ta indica cu na momento cu e fundacion no tin un director un miembro di e hunta di supervision ta tuma e posicion di director temporal mientras ta busca un director fiho, sr. Herve Ruiz a keda nombra como director temporal di fundacion SSA.

Ruiz, ken tabata miembro



di e hunta di supervision a pone su posicion abou pa asina asumi e cargo di director

temporal. Durante su periodo como director temporal di SSA, Ruiz lo enfoca riba ehecuta e recomendacionnan cu a sali di e investigacion di e fundacion y evita cualkier otro irregularidad.

Manera ya ta conoci den luna di september a bira conoci e noticia tocante irregularidadnan den fundacion SSA. E irregularidadnan aki ta inclui fraude of mal uso di fondonan. Ex director di SSA sr. K. Vrolijk a admiti cu el a falsifica firma y a falsifica peti-

cionnan deportivo.

Raad van Toezicht a cuminsa su investigacion caminda nan a haya mas informacion tocante mas documentonan cu no a yega di pasa den bureau di minister Croes pero cu si tabatin firma y stempel, den esaki a constata cu tres hende tabata haya un suma di placa constantemente. Segun minister Croes no ta conoci ken e tres persona aki ta y e tres persona aki ta esun cu a ricibi placa den un forma structural cual a yega te 158.835 florin.

Mirando e conmocion rond di e caso aki, Parlamento di Aruba a yama un reunion publico cu caracter di urgencia pa Croes, cu e momento ey ainda tabata fungi como minister di Enseñansa y Deporte, duna un splicacion tocante e situacion.

Despues di scucha un splicacion amplio di e minister y un reunion extenso cu a dura te oranan di marduga, Parlamento di Aruba a aproba un mocion di desconfianza contra Endy Croes pa motibo cu e sucesonan den fundacion SSA a dañá e confiansa di Parlamento den e minister pa e debido gasto di recursonan pa medio di SSA y cu debi na e accionnan di e minister concerni, Parlamento no por depende riba cu e recursonan di e SSA ta wordo gasta manera mester ta, hasta den calidad di minister saliente.

Pa loke ta e cartera di Enseñansa y Deporte, prome minister demisionario Evelyn Wever-Croes a anuncia recientemente cu su persona mes lo asumi e carteranan aki pa e periodo di gobernacion demisionario cu ta keda.



Stichting Sportsubsidie Aruba